

肥鄉縣志卷三十六

寓賢

子陵寄迹嚴州因以留名衛玠渡江觀者從而盈市苟芳徽之可接亦下邑之生輝地可借以人傳
蹤何嫌於僑寓肥鄉土田饒沃漳水潞洄來者幸樂土之遷過者喜文旌之駐流風餘韻當年之佚
事遙傳剩水殘山後世之芳蹤難竟聲銷迹滅惜流傳不過數人勢易時移特搜葺爲一冊志寓賢
周

程嬰與公孫杵臼皆趙朔客屠岸賈作亂趙朔死於下宮妻生遺腹子武賈索之急嬰匿趙孤於山中得
免後韓厥言於景公殺屠岸賈立武而反其田程嬰自殺以報趙朔武服齊衰三年春秋世祀不絕今
程難堡是其遺跡

按下宮事史記與左傳不同難以懸斷姑仍其舊志以爲肥鄉人府志未載今改入寓賢

魏

管輅字公明平原人明周易精於天文風角占相之術至列人典農王宏直午有飄高三尺餘從申上來
在庭中幢幢回轉息以復起良久乃止直以問輅輅曰東方當有馬吏至恐父哭子如何明日膠東吏

肥鄉縣志

卷三十六 寓賢

一

至直子果亡直問其故輅曰其日乙卯則長子之候也木落於申斗建申申破寅則死喪之候也日加
午而風發則馬之候也離爲文章則吏之候也申未爲虎虎爲大人則父之候也有雉飛來登直內鈴
柱頭直大以不安令輅作卦輅曰到五月必遷時三月也至期直爲渤海大守

出三國魏書

後燕

慕容農奔列人止於烏桓魯利家乃於烏桓張驥說之同舉大事盡驅列人居民爲士卒斬榆爲兵裂棠
爲旗使趙秋說屠各畢聰聰等及劉大等各率兵數千赴之農假張讓爲輔國將軍劉大爲安遠將軍
利爲建威將軍自將破館陶略康臺步騎雲集衆至數萬驥等因共推農爲使持節都督河北諸軍事
監統諸將隨材部署號令嚴明士女喜悅長樂公丕使石越將兵討農農曰今不南拒大軍而來此是
畏王而凌我必不設備可以計取衆請治列人城農曰善用兵者結土以心今起義兵當以山河爲城
池何列人之足治也辛卯越至列人西農使趙秋綦母滕擊越前鋒破之越立柵自固農笑謂諸將曰
越兵精士衆不乘初至之銳以擊我方更立柵吾知其無能爲矣向暮農鼓譟出陣於列人牙門劉大
先帥壯士四百騰柵而入農率大衆隨之大敗秦兵斬越首送於垂

通鑑紀

□本末

唐

韋述邑令景駿之子曾祖宏機家厨書二千卷述爲兒時誦憶略徧及父爲肥鄉令從父之官元行冲以

景駿姑子爲時儒宗亦載書數車相隨述入其室讀之不知寢食行冲異之試與語前世事熟復詳諦如指諸掌屬文受紙輒就行冲曰此外家之寶也舉進士累遷工部侍郎

唐史

明

曾應速號元陽襄陽人爲人狂蕩不羈揮塵談元娓娓不倦壯游齊魯燕趙間久之僑居肥鄉年七十有五彈琴畫梅竹扣几歌呼人莫能測臨終以琴書授弟子藜杖自殉衆爲買田瘞之號元陽塚云

陳海峰金陵人年八十善作文餘草書佩緇布囊藏大筆二枝披布裘重三十斤醉後卽縱筆淋漓若有神助名噪江南北過鄴止列人張太保家春糊松柏粉夏吸葡萄露一日大醉掛巾履於松樹巔攜筆囊露頂赤脚而去越數年有見於潞州者後不知所終

清

孫奇逢字啟泰萬歷庚子舉人與定興鹿善繼昌明道學累徵不起避地蘇門遂家輝縣安貧樂道順治甲午春游齊魯道過肥鄉之函樓講論數夕李貞吉以學問詳貞吉傳劉養才攜王文成公集相質奇逢曰諸儒各分尼山之一節一目以立說總各言其心之所存夫心一耳天理人欲互爲倚伏如我輩此時相對一念清醒便是道心一念放逸便是人心非別有一箇道心來換去一箇人心也只爭此心之存不存耳

肥鄉縣志

卷三十六 寓賢

二

李童號望繩侷有俊才學宗陽明定興鹿善繼高第弟子甲申後攜家南下卜居成安順治癸巳講學於肥鄉文殊寺剖析明暢無不人人志得意滿一時從游者五十餘人